

中國方志叢書·華北地方·第二九四號

陝西 省

延安府志

(四)

成文出版社有限公司印行

中國方志叢書·華北地方·第二九四號

據

清·洪蕙纂修
清·嘉慶七年刊本

影印

陝西 省

延安府志

(四)

成文出版社有限公司印行

延安府志卷六十一

傳錄六

前志

史家著作成書必取前人撰述彙而列之所以辨家學之淵源明折衷之有自也司馬遷十二諸侯表叙則于呂覽虞卿鐸椒左邱明諸家所爲春秋家言反覆推明著書之旨蓋卽百三十篇所由祖述耳班固作遷列傳范氏作固列傳家學具存至沈約之傳范氏姚氏之傳沈約不以史事專篇爲重于是史家不復有祖述淵源之法矣今茲修志而不爲前志作傳是直攘人所有而沒其姓名又甚于

沈姚之不存家學也蓋州縣舊志有五易亡主修之官與載筆之士撰著文詞不分名實一也序跋虛設于書無所發明二也作志之人行業不詳三也書之取裁不標所自四也志當遞續非萬不得已不當迭改迭改之書而欲並存繁重難勝五也于易亡之書而爲之作傳蓋不得已而存之推明其故以爲後人例也

延安府明志燬無考

國朝凡再修順治十七年知府牛天宿等二人康熙十九年知府陳天植等八人

牛天宿章邱人以進士于順治十七年任延安府知府與

膚施縣中書趙廷錫創修延安府志未就天宿序曰郡之有志猶國之有史史總其合志載其分故輯九有之方物而禹貢成採十五國之風謠而詩體備卽遷固陳范諸人罔不博搜遠覽以備一代之觀使州郡不貢其掌故亦烏能集衆狐而成裘滙細流而成川哉况乎昔型藉以昭宣今人視爲觀法郡而無志猶瞽者之無相俛俛乎其何之哉余不敏代匱金明叱馭入境覩其峯巖嶙峍川原浩蕩佳水名山不減山陰道上竊幸文獻之邦其典章文物足以備師資而醫寒儉以故甫下車卽蒐索郡乘用佐興釐之萬一迺訊諸父老紳士僉曰兵燹以來圖書版籍舉付

煨燼予惘然自失者久之方將招流亡勸開墾舉廢墜課耕桑心勞于案牘身疲于應酬一郡大典勿克修舉予愧滋甚未一歲而巡茶使者有通志之修檄下延郡予益茫然無以應也爰是檄行十九屬中曰庶幾有博聞碩士探响嘯之藏抉琅環之秘其人者乎足以商千秋事業矣乃應者半違者亦半或舉其偏而弗悉其全或書其人而弗詳其事或年月乖違或魚豕譌謬每一披閱徒滋浩歎郡志之修蓋戛戛乎其難哉蓋黃耆戕于鋒鏑沿聞化爲燐火則容詠難故府遺編咸歸烈焰大家秘笈旋逐颼塵則蒐討難以至組綬靈依于華表鉛朱魂繞于彤編幽原旣

滯其英魂暴骨弗鐫乎姓氏則紀載更難爾廼走荒原而
詢遺獻撥苔蘚而搜斷碑凡古今吏治之得失風俗人物
之盛衰忠孝節義之芳躅名卿碩士之遺跡以及秀岩靈
秘之蹟元亭西室之藏罔不殫心研究補殘缺訂訛謬先
錄舊聞後錄新編浹五月而帙粗就然或古今難以膠柱
聞見各持堅白號曰信史怒焉懼之適趙君玉譜南宮捷
旋予乃躍然曰千秋事業端在是矣玉譜以太傅之裔攻
縹緗之業博物洽聞僑盼勿讓況生于此地而誌斯地之
事如數家珍勿爽毫髮者乎今讀其所論次簡而核嚴而
肅卓乎有良史風予乃得藉手以告厥成矣卽不敢謂足

備輶軒之采而典型在望或可幸寡過之有地耳

趙廷錫序曰志何昉乎說者曰自竇威始不信經不信史而信傳後世之不古若也然上古九邱八索三墳諸書伐冢者奚以多茲爲莽莽也自攝提合雜循蜚䟽仡而下禹貢分九州以紀疆域紀田賦已開志之祖矣稽之周禮邦國之志小史掌之四方之志外史掌之又何嘗自竇威始也志者史之流史以翼經志以翼史殊塗而同歸者此也昔空同子論志之觀者三而總徹于道其綜古今核名實可以觀學學以昭事事以布文卽褒貶寓勸懲可以觀政政以行遠遠以徵信比例屬詞編年記事可以觀世然論

世知人而其政彰其學淳以興民行以敦民風皆于焉繫
故曰總徹于道志固可易言歟他不具論一統志近于侈
輿圖志近于略山謙懷文之區邑志近于繁雜而無紀何
以詳略稱善使伐冢者以不多茲爲莽莽也明興詔天下
郡邑各以志獻與版籍同登金華學士嘗總其成至世宗
再下編緝之令而稱大備矣但風移俗易三十年則爲一
世志之與時推遷與日注等增修安可勿亟亟也吾延舊
志自宏治壬戌太守王公彥奇曾一修之二百年來各邑
之增葺時或間聞而獨郡志則闕然如故其梨棗之藏奸
胥每竊以爲薪至鼎革則蕩然俱盡矣觀風守土之使奉

命而來首詢利弊亦時掌故是求卽殘編蠹蝕者亦不可得
文獻無徵寧獨杞宋足慨予方伏櫪芸窗焚膏之餘時懷
蒐討之志走檄購引閱十年而得一帙方全志之半亦成
宏以前事辛丑秋首予方歸里太守牛公上承徵志之舉
而徧催各邑槩以無所考爲遲遲因以謀之于予予搜舊
藁集新聞雖搆一成書而缺略者多嗣歷滄桑授梓爲艱
余亦匆匆入都風塵久之每以吾延之志未嘗頃刻置諸
懷也一日余弟走書曰郡守陳公蒞政吾延勸農課士之
暇停簿書而理几硯卽以余之積草博徵遠稽郡志已告
成矣余之縈懷者十數年今志之成豈非快事哉余今補

舍人官其亦猶周之小史天下古今之書籍圖志俱貯宏
文庫此亦余之責也若吾延之志得藉陳公以傳不朽余
數千里外思陳公之教愧未親炙然神往左右景行在望
聞擇其吾延之能文者彙輯之公聽斷之餘無不親加叅
校勒成全志豈啻山川改觀人文亦爲之生色異日輶軒
之使采風問俗以上備顧問以下資學士大夫之考訂無
不嘉公之著作且幸予志之得成于公也故附諸公後而
爲之序

陳天植浙江永嘉人以貢士于康熙十六年任延安府知
府于十八年與清澗人翰林院檢討白乃貞同知王際有

王守錄教授黎時雍膚施縣教諭王象斗膚施人國子監

候補學正趙廷颺中部布衣劉爾憐膚施生員武經周等

增修書成目錄一卷附圖四曰星圖曰疆域圖曰城圖曰

邊圖表一曰沿革表志十卷輿地第一曰星野曰沿革曰

疆域

附河套

曰災祥曰風俗曰形勝曰城池

附鎮堡

曰古

蹟曰山川

附泉井池潭

曰景致凡十部建置第二曰公署

曰學校

附書院社學

曰坊表曰倉場曰驛鋪曰關梁凡六

部田賦第三曰戶口

附存留

曰地畝曰站支曰鹽法曰物

產凡五部兵防第四曰兵制曰屯田曰馬政

附茶

曰糧餉

曰軍器

附烽火

秩祀第五曰祠祀曰寺觀曰陵墓凡三部

官秩第六曰封建曰職官曰宦績凡三部選舉第七曰薦
辟曰進士曰鄉舉曰貢選曰武職曰封蔭曰武科凡七部
人物第八曰列傳曰孝義曰忠烈曰列女曰隱逸曰流寓
曰仙釋凡七部紀載第九曰紀事

附僭竊盜賊

藝文第十

曰

御製曰奏疏曰條議曰書曰碑記曰序曰墓志曰文曰詩凡
九部十八年修起至十九年功竣書徒列名目挂漏甚衆
又引用故實失于不考然創始之難自古已然要其搜採
固已勤矣天植叙曰於鑠

皇清奄有四海三十餘年撥文奮武赫然覃被猗與盛哉洵

足駕漢唐而軼商周且購求遺書

詔天下郡國各以志來上殆將集六合之實編爲一統之全書大哉

王言真監數代之章程而垂奕世之雅化于無窮也各憲仰承

聖天子右文崇治之深心曾彙纂全秦志亦旣上下古今小大州邑靡不條分縷悉彬彬乎質文相宣較若列眉矣治郡者憲章而力行之亦何不可以治全秦者治茲一郡乎然志全秦者其綱而志一郡者其目也故綱不得不謂之要而目不可不謂之詳甚哉郡之不可無專志而治郡者

之不可不知所志也歲乙卯延安再勞

王師甫經戡定政涉淵求濟之日丁巳春各憲不以天植爲
樸橄材薦守是邦

命後懍懍危懼恐不克勝任以貽蚊負羞受事來行邁靡靡
見夫荒城絕域城社邱墟黍離麥秀之感搖搖心目爰思
康田引養哀我憚人而集此中澤之鴻雁二載間拮据况
瘁不遺餘力亦旣枹鼓不聞瘡痍寢復然欲周知土風之
利弊政教之因革與其師心而行之何如議事以爲治猶
憶余嘗筮仕山海曾纂一志以佐智力之不逮顧茲延郡
重地當秦關百二之雄輿圖遼濶生齒繁衍守土者欲敷

化而宜民苟不做郡志爲董戒規竊恐宜于古而未必宜于今便于彼而未必便于此則大小馮君韓范諸公得不咲人千古甚哉郡志之有關於政教也夫豈淺鮮哉因咨士人而訪厥志念舊郡有集版籍殘燬久未修舉前守牛公暨中翰王譜趙鄉先生嘗留心志乘草纂成編槩略未梓植議加訂續謀登梨棗遂面其說于各憲臺蒙俞其請計詣榆憲王榆鎮大帥高副戎謝及及各協路列將郡屬僚友相與捐貲共襄厥成然卷帙若若慮難卒業遂造求湖南方伯梁公薛粵東臬司仲錫王兩鄉先生固所以襄殺青之費乎亦以示斯舉之不敢專也慮既定乃敦請清

澗太史蒞淵白鄉先生總裁之聘中部處士劉敬子膚施
國學正蔚生鄉先生纂輯之郡博黎君邑鐸王君參閱而
校正之文學姚子青陽考訂之顧諸公以曠世才洞達古
今貫徹邱索而于一郡之利弊因革知之綦詳與之蒐州
邑之紀乘考衛所之故實或本舊章而修飾之或各出見
聞而增補之缺者備而外者叙書凡若干卷幾閱月而稿
乃脫見夫郡圖之疆理麗列宿星躔之度數有定限則志
分野卽可以察災祥幅輳之廣狹必紀山川之形勝悉書
則志地輿卽可以驗物產州邑有更名城池或異處建置
于是志沿革廟祀修蒸嘗陵墓須豆登秩祀于是志崇報